

Union Europeo ta acorda financiamiento di proyecto di energia alternativo pa Parke Nacional Arikok

Aki 5 luna, coriente genera na parke mes lo ta riba sistema di Elmar



Sr. Ambrosio Curiel



Maria Dijkhoff Pita



David Ferreira

ORANJESTAD—Parke Nacional Arikok pronto lo ta e prome instancia cu ta haci uzo di fuente di energia alternativo, conecta cu sistema di ELMAR. Y pa logra esaki, ayera Director di Departamento di Asuntunan Economico, den su categoria como representante di comision Europeo na Aruba, esta Maria Dijkhoff Pita y Representante di Stork/Wescar David Ferreira a firma un convenio di financiamiento pa panelnan solar y Molina di biento pa e parke.

Ta trata di instalacion di dos panel solar, un tiki menos di 100 meter cuadra cada un, cu mester keda instala banda di oficinanan di Parke Nacional Arikok y tambe un Molina di biento cu mester percura pa iluminacion di e area di staciona auto. En total, lo produci 12.5 kilowatt na coriente, cu ta bon pa suministracion di 30 porshento di necesidad di coriente di Parke Nacional Arikok.

E formalisacion di e relacion di trabou a tuma luga ayera den oficinanan di Direccion pa Asuntunan Economico, den presencia di Director di Parke Nacional Arikok, Sr. Ambrosio Curiel. Curiel a bisa cu e acuerdo nobo, unda Union Europeo ta financia un proyecto di 200 mil florin pa instalacion di panelnan solar y e Molina di biento pa genera coriente, ta algo grandi pa un instancia cu ta traha netamente riba conservacion. E proyecto ta e di tres cu ta financia for di un programa di financiamiento di Union Europeo destina pa Aruba. Ya a paga pa un infraestructura nobo, y tambe un compleho di bishitante mas oficinanan den Parke Nacional Arikok. Y awor, e proyecto di energia alternativo a sigui, y despues di hopi negociacion a logra haya aprobacion di Union Europeo pa realisa e trabounan.

Curiel tabata gradecido na particularmente Maria

Dijkhoff Pita y tambe Sr. Dennis Wever di DOW cu a guia e proyecto, cu lo inicia e aña aki ainda, pa termina denter di 5 luna. Ta otro logro pa un proceso cu a inicia durante periodo di Gabinete Eman III, y despues di a sigui bou Gobierno di Sr. Oduber, y awor un biaha mas ta cay bou maneho di un otro Gobierno, esta Gabinete Mike Eman I. E Director di Parke Nacional Arikok a bisa cu Sra. Maria Dijkhoff Pita a hinca asina hopi esfuerzo den Parke Nacional Arikok, cu un dia mester spera pa nombra un mata na su honor. “Sin su corahe y lucha, lo no a cristalisa e proyecto aki.” Curiel a bisa cu den curso di otro aña, Parke Nacional Arikok lo produci un buki conmemorativo, unda lo elabora riba tur esnan cu a contribui na realisacion di e parke, pero tambe na e diferente proyectonan di balor den e area di conservacion.

TERITORIO LO TA PROTEHI PA NATURESA

Y e area di conservacion por crece unicamente. Te ainda ta pendiente e decision pa Spaans Lagoen y otro areanan apunta pa keda conserva, bay resorta bou maneho di Fundacion Parke Nacional Arikok. “Asina aki, Aruba lo ta un di e poco paisnan rond mundo unda 30 porshento di su teritorio lo ta protehi pa naturalesa.” Un proyecto di energia alternativo, ademas di colaboracion cu diferente instancia di Gobierno ta permiti Parke Nacional Arikok baha su gastonan di operacion, na interes di comunidad. Pero asina mes, ta cla pa sigui progreso a base di alianzanan cu instancianan internacional. Un di nan ta US Park Services, Dutch Caribbean Nature Alliance y Departamento di Waterstaat di Hulanda ta otro. Un di e proyectonan ta pa construi damnan den algun

di e rooinan den Parke Nacional Arikok pa asina por percura pa provision di awa, sin cu esaki mester afecta e balance natural di e area. Otro plannan ta inclui expansion di e generacion di coriente pa medio di mas fuente di energia alternativo, manera e uzo di e olanan na Noordkust.

Maria Dijkhoff Pita di su banda ta felicita Aruba cu e proyecto di energia alternativo pa Parke Nacional Arikok. E ehecutivo publico a bisa cu ta for di inicio di e proyecto total cu Union Europeo a dicidi pa sostene pa Aruba a inclui plannan pa ‘energia berde.’ “Mester wak pa futuro, y tabata e intencion pa e parke tabata completamente ‘berde.’ Lamentablemente tabata dificil pa logra esaki via Elmar, pero danki na lucha di Parke Nacional Arikok mes a logra cu Elmar a bay de acuerdo pa inclui e partinan aki tambe.” Sra. Dijkhoff Pita a bisa cu e compania Stork/Wescar tambe a mostra hopi pasenshi, pasobra logra financiamiento for di Union Europeo pa un proyecto no ta facil, ya cu ta exige hopi administracion. Pa tal motibo mes ta urgi comunidad pa sigui sostene Parke Nacional Arikok, cu awor por sirbi como ehempel pa tanto proyectonan den Gobierno como sector priva. “Cu por haci uzo di energia alternativo pa produci e coriente necesario pa bo edificio. Mi ta spera lo por habri su portanan pa tur hende cu kier wak con e ta funciona, pa asina otro instancia conoce e sistemanan aki.”

Di su banda, Director di Parke Nacional Arikok Ambrosio Curiel a bisa cu apesar cu a cuminsa cobra un suma di conservacion pa bishita e parke, tur hende por drenta te na e Compleho di Bishitante sin mester paga algo y asina por observa e sistema asina cu e ta cla aki algun luna.